

**FEDERALNO MINISTARSTVO RADA I SOCIJALNE POLITIKE
EKONOMSKO- SOCIJALNO VIJEĆE ZA TERITORIJU FEDERACIJE
BOSNE I HERCEGOVINE**

Broj: 03-34/19-612/14
Sarajevo, 18.03.2014. godine

Z A P I S N I K

sa vanredne sjednice i 100-24. redovne sjednice Ekonomsko-socijalnog vijeća za teritoriju Federacije Bosne i Hercegovine, održane dana 18.03.2014.godine u 14 sati.

Sjednicom predsjedava Edhem Biber, predsjednik Ekonomsko-socijalnog vijeća.

Prisutni predstavnici Vlade: premijer Nermin Nikšić, ministri Ante Krajina, Enver Bijedić, Erdal Trhulj.

Prisutni predstavnici Sindikata: Ismet Bajramović, Omer Sikira, Šaban Kadirić, Avad Bahto, Selvedin Šatorović.

Prisutni predstavnici Poslodavaca: Safudin Čengić, Mladen Pandurević, Edin Ibrahimpašić, Predrag Čović, Seid Kapetanović, Selim Babić

Sjednici nisu prisustvovali: Jerko Ivanković-Lijanović, Zukan Helez, Tomislav Slišković, te Vjekoslav Čamber, Rifat Mahmutović i Salih Kruščica koji su ispričnicom opravdali svoj izostanak.

Osim članova Ekonomsko-socijalnog vijeća sjednici je prisustvovao Dragan Mioković iz Federalnog ministarstva unutrašnjih poslova.

DNEVNI RED (venredna sjednica)

1. Informacija o aktuelnoj ekonomsko-socijalnoj i bezbjedonosnoj situaciji, te prijedlogu mjera za prevazilaženje trenutnog stanja u Federaciji BiH.

Za predloženu tačku dnevnog reda predstavnici Poslodavaca i Sindikata pripremili su materijale i očekuju da će i Vlada FBiH također učestvovati u informiranju o aktualnoj ekonomsko-socijalnoj i bezbjednosnoj situaciji.

Prema riječima premijera Vlade Federacije BiH dogovoreno je da se održi tematska sjednica Vlade Federacije BiH na kojoj bi se raspravljalo o datoj problematici, a nakon toga i na ESV-u.

Pored toga, gđin. Dragan Mioković informirao je socijalne partnere da je stanje u ovom momentu stabilno, protesti se održavaju pod kontrolom policije, ali da bi u

svakom trenutku moglo doći do neželjenih preokreta. S tim u vezi napomenuo je da Nacrt zakona o izmjenama i dopunama zakona o unutrašnjim poslovima predviđa podizanje efikasnosti policije na veći nivo od dosadašnjeg.

Predstavnici Poslodavaca smatraju da su zahtjevi prosvjednika opravdani, ali su izrazili zabrinutost zbog blokade ulica i prometa, koje praktično blokiraju funkcioniranje privrede i izazivaju značajne štete, te da se nadaju da će se omogućiti nesmetano obavljanje privredne djelatnosti i da će Vlada otkloniti nedostatke koji su doveli do bunta.

Predstavnici Sindikata izrazili su žaljenje zbog nastale štete. Također su naveli da NVO žele da se uključe u rad ESV. Na plenumima građana može doći do zahtjeva za uključivanje NVO-a u rad ESV-a ili da se u protivnom ukine rad ESV-a. Smatraju da je politički aspekt u sve umiješan, te da ESV svojim radom treba da opravda postojanje.

Pored toga naveli su da je ovo društvo u cjelini nepravedno, sa nepravednim raspodjelama, u kojemu se trebaju zaustaviti negativni trendovi, financiranje političkih stranaka iz budžeta i sl.

Premijer Vlade FBiH potvrdio je da su štete u privredi zbog protesta bile velike, i naglasio da su se u vrijeme protesta jasno razlikovali oni koji su stvarno obespravljani i koji su pokušali da iz situacije izvuku političku korist. Protesti se mogu održavati, ali privreda ne smije da trpi negativne posljedice. Također smatra da se na ESV-u trebamo suzdržati od paušalnih izjava koje stvaraju negativnu klimu i da govorimo o konkretnim pokazateljima, kao što je povećanje industrijske proizvodnje, društvenog bruto proizvoda, itd. Na izmjene pojedinih stvari Vlada može da utiče, ali su neke postavljene kao zahtjev i trenutno se ne mogu se mijenjati.

Socijalni partneri su saglasni da se tematska sjednica Vlade Federacije BiH, na kojoj će se razmatrati ekonomsko-socijalna situacija u Federaciji BiH i prijedlog mjera za prevazilaženje krize, održi 03. aprila 2014. godine. Tematskoj sjednici uz članove Vlade Federacije BiH prisustvovat će i delegacija Udruženja poslodavaca FBiH i Saveza samostalnih sindikata BiH.

U nastavku vanredne sjednice održana je redovna 100-24 sjednica Ekonomsko socijalnog vijeća sa sljedećim dnevnim redom:

DNEVNI RED

1. Usvajanje zapisnika sa 99-23. sjednice ESV-a;
2. Izvještaj o radu ESV-a za 2013. godinu i realizacija zaključaka ESV-a;
3. Usvajanje Izvještaja o finansijskom poslovanju ESV-a za 2013. godinu i finansijski plan poslovanja ESV-a za 2014. godinu;
4. Evidencija o prisustvu sjednicama ESV-a;
5. Razno

Ad. 1

Prilikom usvajanja zapisnika gđin. Ismet Bajramović sugerirao je da u zapisniku tačka razno bude dopunjena njegovom diskusijom kako slijedi u citatu: „Zakon o unutrašnjem platnom prometu FBiH nije bio uvršten u dnevni red, ali je ministar Bijedić, ipak, u skladu sa prijedlogom gđina Pandurevića, dao kratko obrazloženje pomenutog zakona, sa osvrtom na amandman koji se odnosi na osiguranje mogućnosti da BiH Pošte i HP obavljaju dio unutrašnjeg platnog prometa. Kratko obrazloženje je dao i ministar Krajina. Reagovali su ministar Bijedić, gđin Ismet Bajramović i gđin Avad Bahto

Ismet Bajramović je rekao da je, i prije sjednice, Ekonomsko-socijalno vijeće FBiH podržalo amandman koji je dat na Zakon još dok je on bio u formi Nacrta, te nam ne pada napamet da pogazimo ono što je dogovoreno, tj. SSSBiH i dalje ostaje pri stavu da se mora ispoštovati stav ESV FBiH, odnosno amandman se mora ugraditi i u formu Prijedloga zakona.

Avad Bahto je rekao da poslovanje BH Pošta i HP, kao i finansijske tokove unutar FBiH trebaju kontrolisati Vlada FBiH i resorno ministarstvo, a ne Agencija za bankarstvo“

Ad. 2, 3

Izveštaja o radu ESV-a za 2013. godinu i realizaciji zaključaka ESV-a prihvaćen je od strane socijalnih partnera.

Razmatranje Izveštaja o finansijskom poslovanju ESV-a za 2013. godinu i finansijski plan poslovanja ESV-a za 2014. godinu slijedila je diskusija predstavnika Poslodavaca, indirektno vezana za ove tačke dnevnog reda, a odnosila se na potrebu preispitivanja Pravilnika o radu ESV-a i Odluke o naknadama za učešće u radu ESV s ciljem uštede sredstava. Iz istog razloga predložili su da se financije ESV-a vode u Federalnom ministarstvu rada i socijalne politike.

Stručna služba ESV-a dala je i u prethodnim godinama obrazloženje vezano za vođenje financija ESV-a. Odnosno, ESV registrirano je kao zaseban subjekt u Poreznoj upravi Federacije – ID broj 4200727090006, pod šifrom djelatnosti 75.132 – Ostala udruženja. Jedan od uslova za registraciju subjekta je i otvaranje transakcijskog računa. Iz budžeta Federalnog ministarstva rada i socijalne politike, Federalno ministarstvo financija mjesečno prebacuje 1/12 odobrenih sredstava sa pozicije Tekući transferi (614300).

Na temelju Zakona o računovodstvu koji je stupio na snagu 2011. godine, donesen je i Pravilnik o kontnom okviru, sadržaju konta i primjeni kontnog okvira za privredna društva (Sl. novine FBiH br. 82/10). Nefitne organizacije i udruženja nemaju takav Pravilnik, pa se prema Uputstvu postojećeg Pravilnika za privredna društva isti kontni okvir koristi i za nefitne organizacije i udruženja.

Neiskorištena sredstva na transakcijskom računu ESV-a na kraju prethodne godine, zajedno sa sredstvima planiranim u budžetu FBiH za narednu godinu, predstavljaju ukupna sredstva kojima ESV može raspolagati u tekućoj godini.

S obzirom na navedene činjenice, finansijsko poslovanje ESV-anije moguće voditi kroz trezorsko poslovanje javne uprave.

Predstavnici Sindikata istakli su da rad ESV-a treba da bude podrška radu Vlade i zakonodavstva. Ukoliko ESV-a nije ispunilo stvarnu ulogu i ukoliko nisu postignuti rezultati, onda ni naknade nisu zaslužene. Također smatraju da nije dopustivo da sjednice ESV-a budu odgođene zbog nedostatka kvoruma delegacije Vlade i da zbog čestih upita poslanika da li je neka od tema razmatrana na ESV-u, treba tražiti od Parlamenta Federacije BiH da predstavnici ESV-a dolaze na sjednice Parlamenta.

Izvještaja o finansijskom poslovanju ESV-a za 2013. godinu i Finansijski plan poslovanja ESV-a za 2014. godinu su usvojeni, sa napomenom da će se na jednoj od narednih sjednica razmatrati izmjene i dopune Poslovnika o radu ESV-a, kao i rebalans Budžeta ESV-a.

Ad. 4

Socijalni partneri upoznati sa evidencija o prisustvu sjednicama ESV-a

Sjednica Ekonomsko-socijalnog vijeća zaključena je u 16 sati.

Na Kolegiju ESV-a koji je zakazan za 25.03.2014. godine u 10 sati, bit će utvrđen dnevni red i datum održavanja naredne sjednice ESV-a.

Zapisnik pripremila
Snježana Kapić

Predsjednik ESV FBiH
Edhem Biber